



Inatsisartunut ilaasortaq
Jørgen Rosbach, Demokraatit
/Maani

Ulloq: 06/08 2025
Suliap nr. 2025 - 15552
Dok. Nr. 25585181
Postboks 930
3900 Nuuk
Tlf. (+299) 34 68 00
Fax (+299) 32 43 02
E-mail: mlsa@nanoq.gl
www.naalakkersuisut.gl

Kalaallit Nunaanni sioqqanik milluaasarneq pillugu § 37 naapertorlugu apeqquteqaammut nr. 114-imut akissut

Kalaallit Nunaanni sioqqanik milluaanermut maleruagassat aammalu ukiuni 5-ini kingullerni sioqqanik milluaanernik suliaqarnerit pillugit Inatsisartut suleriaasianni §37, imm. 1 naapertorlugu Naalakkersuisunut apeqqutit matuma kingulianiittut saqqummiuppatit.

Apeqqutit matuma kinguliani akissuteqarfigineqarput.

Apeqqut 1. Sioqqanik milluaanermut malittarisassat atuuttut suuppat?

- a. Immami- aamma sinerissami sioqqanik ujaraaqqanillu piiaanissamut killilersuinerit qanoq ittuuppat?**
- b. Avatangiisinut misissuinernut, akuersissutinut aamma nakkutilliinernut suut piumasaqaataappat?**
- c. Oqartussat kikkut sulianut taakkununga akisussaasuullutillu nakkutilliisuuppat?**

Akissut: Sioqqanik milluaanermut maleruagassat atuuttut najukkani aatsitassanut tunngasunik suliaqarneq pillugu Inatsisartut inatsisaanni nr. 34-mi ulloq 4. juni 2024-meersumi § 30-miit 33-mut takuneqarsinnaapput.

- a) Piffissamut ukiut pingasut tikillugit sivilissusilimmut imaani sinerissamilu sumiiffinni killissalersugaasuni sioqqanik ujaraaqqanillu qalluinissamut akuersissummik qinnuteqartoqarsinnaavoq. Sioqqanik milluaanernik suliaqarni atugassarititaasut nalinginnaasut ataatsimoortut aammalu pisut ilaanni atugassarititaasut immikkut ittut malinneqartussaapput. Sioqqanik ujaraaqqanillu milluaanermut atugassarititaasut nalinginnaasut Aatsitassanut oqartussap nittartagaani takuneqarsinnaapput: <https://govmin.gl/da/lokal-minedrift/sandsugning/>.
- b) Aatsitassanik Suliassaqaarfinnut Avatangiisinut Aqutsisoqarfik sioqqanik milluaanernik suliaqarnernut avatangiisinut atugassarititaasunut tunngatillugu oqartussaatus akisussaasuvoq. Sioqqanik milluaanermi avatangiisinik misissuinernut avatangiisinillu allanngutsaaliuineranut piumasaqaatit pingaarnert najukkani aatsitassanut tunngasunik suliaqarneq pillugu Inatsisartut inatsisaanni kapitali 8-mi takuneqarsinnaapput. Teknikki atorineqarsinnaasoq pitsaanerpaaq, sulianik ingerlatitsinerit aammalu pitsaaliuilluni iliuusissanik suliniuteqarnernillu ilisimasat atorineqassasut, immikkut §36-mi piumasaqaatigineqarpoq.
Tusarniaanermi Aatsitassanut Ikummatissanullu Aqutsisoqarfimmit nassinneqartumi avatangiisinut sunniutaasussat kiisalu suliniutissat

annikillisitsisinnaasut Aatsitassanik Suliassa qarfinnut Avatangiisinut Aqutsiso qarfimmi nalilersorneqartarput. Nalilersuiner mi tassani Pinngortitaleriffimmit (GN) aamma Nationalt Center for Miljø og Energi-mit (DCE) ilisimatuussutsikkut ilanngussassat tamatigut akuutinneqartarput. ilisimatuussutsikkut ilanngussat aammalu suliniutit ataasiakkaat tunngavigalugit Aatsitassanik Suliassa qarfinnut Avatangiisinut Aqutsiso qarfik suliniutip ingerlanneqarnissaanut atugassarititaasunik piumasaqaateqartarpoq. Najukkami avatangiisit illersorniarlugit aammalu sumiiffimmi sioqqanik milluaaviusumi uumasut naasoqarneratalu sunnerneqarsinnaaneri annikillisinniarlugit atugassarititaasut taakkua piumasaqaatigineqartarput.

Akuersissutinut tunngatillugu sioqqanik milluaanissamik akuersissuteqarfigineqartussaq CVR-normoqartussaavoq, kiisalu qinnuteqarnermut akiliut aamma tunniussinermut akiliut 1.000 DKK aamma 3.000 DKK akilerneqartussaallutik.

Nakkutilliinermut tunngatillugu ”Immap naqqani atortussiassanik pii aanermut atugassarititaasut nalinginnaasut” ([Standardvilkår for indvinding af havbundsmaterialer](#)) kapitali 6-ip ataani immikkoortoq 6.1-imi allassimavoq ”Aatsitassanut oqartussaq pisinnaatitsissummik pigisaqartup akuersissuteqarneq naapertorlugu ingerlataannut nakkutilliisuvoq aammalu allanik nakkutilliinermik suliaqartussanik toqqaasinnaalluni, takuuk Aatsitassanut ikummatissanullu inatsimmi § 86, imm. 2. Nakkutilliisut sukkulluunniit eqqartuussivimmit aalajangiinertaqaanngitsumik, aammalu nakkutilliinerup isumaginissaanut tamanna pisariaqartillugu, suliffeqarfinnut ilaasunut tamaginnut isersinnaapput. Pisinnaatitsissummik pigisaqartup ingerlatai tamaasa malinnaaffiginissaannut nakkutilliisut pisinnaatitaapput aammalu akuersissuteqarneq naapertorlugu pisinnaatitsissummik pigisaqartup ingerlatai pillugit pisinnaatitsissummik pigisaqartumit paasissutissanik tunineqarnissaq piumasarisinnaallugu.”

- c) Aatsitassanut oqartussap taamaalilluni sioqqanik milluaanermik suliaqarnerit allaffissornikkut aqunnissaat nakkutilliiviginissaallu akisussaafiggaa. Aatsitassanut oqartussaq tassaavoq Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup ataani Teknikkinut Nakkutilliinermullu Immikkoortorta qarfik aamma Pisinnaatitsissutinut Immikkoortorta qarfik, kiisalu Pinngortitamut Avatangiisinullu Naalakkersuisoqarfiup ataani Aatsitassanik Suliassa qarfinnut Avatangiisinut Aqutsiso qarfik.

Apeqqu 2. Suliffeqarfinnut qassinut isumaqatigiissutit sioqqanik milluaanissamut ukiuni kingullerni tallimani suliarineqarsimappat?

- a) Suliffeqarfinnit taakkunannga qassit Kalaallit Nunaanni angerlarsimaffeqarpat?
- b) Qassit nunanit allanit aggersuuppat?
- i. Nunanit arlaanniit?

- c) Naalakkersuisut paasissutissiisinaanernerpat suliffeqarfiit pineqartut ukiumut piffissami tassani katillugu sioqqat ujaraaqqallu qanoq annertutigisut qallorsimaneraat?

Akissut: 2020-miit 2025-mut ukiuni tallimani kingullerni sioqqanik milluaanermut ingerlatseqatigiiffinnut pingasunut isumaqatigiissutit 13-it isumaqatigiissutigineqarput. Sioqqanik milluaanissamut akuersissuteqarnerit ingerlasut tamarmik Aatsitassanut oqartussap qinnuteqaatinut nittartagaani takuneqarsinnaapput, portal.govmin.gl.

- a) Ingerlatseqatigiiffiit pingasut tamarmik Kalaallit Nunaanni angerlarsimaffeqarput. Taamaattoq ingerlatseqatigiiffik ataaseq Savalimmiormiut ingerlatseqatigiiffiata ataani ingerlatseqatigiiffiuvoq.
- b) Soqanngilaq (attuumassuteqanngilaq, tassami ingerlatseqatigiiffiit tamarmik Kalaallit Nunaanni angerlarsimaffeqarmata).
- c) Ingerlatseqatigiiffiit pingasut taakkua ukiuni tallimani kingullerni makkuninnga annertussusilinnik piiaanissamut akuerineqarput: 2020: 36.000 m³, 2021: 36.000 m³, 2022: 45.000 m³, 2023: 65.000 m³, 2024: 70.000 m³, 2025: 62.250 m³.

Apeqput 3. Qanoq annertutigisumik Namminersorlutik Oqartussat isertitaqarsimappat akuersissutinit, akitsuutinit allanillu akiliutinit ukiuni tallimani kingullerni sioqqanik milluaanermiit?

Akissut: Sioqqanik milluaanissamut akuersissuteqarnernut qinnuteqarnermut akiliutaavoq 1.000 DKK aammalu tunniussinermut akiliutaavoq 3.000 DKK, taamaalilluni qinnuteqarnernut tunniussinernullu akiliutinit isertitat tamarmiusut killeqarlutik. Kisianni isertitat taakkua saniatigut ilimagineqartariaqarpoq akileraarutinit, umiarsualivimmut akitsuutinit il.il. isertitaqassasoq. Kalaallit Nunaanni sioqqanik milluaanerup inuiaqatigiinnut naleqarnera nalileruminaassinnaavoq, kisianni ilimagineqarluni annertuujusoq. Tassami Kalaallit Nunaanni attaveqaasersuutini annertuuni, aamma illuliornernik sanaartornernillu suliassani sioqqanik ujaraaqanillu, ilaatigut aqqusinniornernut betonnginillu sanaartornernut atorneqartartunik, najukkami pilersuinissaq pinngitsoorneqarsinnaanngilluinnarpoq. Tamatumunnga taarsiullugu sioqqat ujaraaqqallu avataaniit eqqussorneqassagaluarpata, tamanna nunatsinni maani illuliassanik sanaartugassanillu annertuumik akisunerulersitsisussaavoq.

Apeqput 4. Naalakkersuisut oqaluuserisamut soqutiginaatilinnik allanik paasissutissiisinaanernerlutik?

Akissut: Tamatuma saniatigut paasissutissiissutigineqarsinnaavoq, sioqqanik milluaanissamut qinnuteqaatit tamarmik oqartussanut soqutigisaqatigiiffinnullu attuumassutilinnut tusarniaassutigalugit nassiunneqartarmata. Tamatuma kingorna akuersissuteqarnernik nutaanik tunniussinermi tusarniaanermut akissuteqaatit tiguneqartut eqqarsaatigineqartussaapput, tamanna amerlanertigut

akuersissuteqarnermi immikkut ittunik atugassarititaasunik kinguneqartarluni. Assersuutigalugu aalisarfiusartunut, sinerissap neriorneqalersinnaanerata aarlerinaateqarneranut kulturikkullu eriagisassanut tunngatillugu tamanna pisinnaasarpoq.

Inussiarnersumik inuulluaqqusillunga

Naaja H. Nathanielsen

Naaja H. Nathanielsen

Inuussutissarsiornermut, Aatsitassanut, Nukissiutinut, Inatsisit
Atuutsinneqarnerannut Naligiissitaanermullu Naalakkersuisoq